

IX bo‘lim. Bojxona statistikasi. Bojxona ishida axborot-kommunikatsiya texnologiyalari. Intellektual mulk obyektlariga bo‘lgan huquqlarni himoya qilish

53-bob. Bojxona organlari tomonidan bojxona statistikasini yuritish

375-modda. Bojxona statistikasi

Bojxona organlari O‘zbekiston Respublikasi Davlat bojxona qo‘mitasi tomonidan belgilanadigan uslubiyot va tartibga muvofiq bojxona statistikasini yuritadi va shakllantiradi.

Bojxona statistikasi ma‘lumotlaridan bojxona organlari tomonidan bojxona maqsadlari va bojxona organlarining zimmasiga yuklatilgan boshqa vazifalarni bajarish uchun foydalaniladi.

Bojxona statistikasini yuritish uchun shaxslar tomonidan ushbu Kodeksga va boshqa qonun hujjatlariga muvofiq bojxona organlariga taqdim etiladigan hujjatlar hamda ma‘lumotlardan, shuningdek bojxona organlari ixtiyoridagi hujjatlar va ma‘lumotlardan foydalaniladi.

Bojxona organlari davlat, tijorat, bank sirini yoki qonun bilan qo‘riqlanadigan boshqa sirni o‘z ichiga olgan bojxona statistikasi ma‘lumotlarini oshkor etmasligi shart, bundan qonun hujjatlarida nazarda tutilgan hollar mustasno.

Bojxona statistikasi tashqi savdo bojxona statistikasi va maxsus bojxona statistikasiga bo‘linadi.

376-modda. Tashqi savdo bojxona statistikasi

Tashqi savdo bojxona statistikasi O‘zbekiston Respublikasining tashqi savdo tovar aylanmasi bo‘yicha uning

miqdori va qiymati ifodalangan, tizimlashtirilgan ma'lumotlar yig'indisidan iboratdir.

Tashqi savdo bojxona statistikasining asosiy vazifalari davlat organlarini O'zbekiston Respublikasi tashqi savdo tovar aylanmasining holati to'g'risidagi axborot bilan ta'minlash, O'zbekiston Respublikasi Davlat budgetiga bojxona to'lovlarining tushishini nazorat qilish, valyuta nazoratini va O'zbekiston Respublikasi bojxona organlari zimmasiga yuklatilgan boshqa vazifalar amalga oshirilishini ta'minlashdan iborat.

377-modda. Maxsus bojxona statistikasi

Maxsus bojxona statistikasi bojxona organlari faoliyatining turli yo'nalishlari bo'yicha tizimlashtirilgan, tashqi savdo bojxona statistikasini yuritish bilan bog'liq bo'lmagan ma'lumotlar yig'indisidan iboratdir.

Maxsus bojxona statistikasi bojxona organlarining faoliyatini o'rganish, boshqaruvini tashkil etish va ushbu faoliyatni takomillashtirishning asosiy yo'nalishlarini belgilash uchun yuritiladi.